

Nilai semula NAM: Mahathir

BELGRADE, Ahad — Perdana Menteri Datuk Seri Dr Mahathir Mohamad, mahu Pergerakan Negara Berkecuali (NAM) menilai fungsi dan pencapaiannya supaya pergerakan yang berusia 28 tahun itu menjadi lebih berkesan dalam perkembangan dunia hari ini.

"Kita ingin tahu apakah pentingnya NAM sekarang dan bagaimana pergerakan itu boleh memainkan fungsi yang berorientasikan tindakan. Memang ini mudah dicakup tetapi sukar dibuat, bagaimanapun setelah 28 tahun ditubuhkan peranan NAM perlu dinilai," katanya.

Bagaimanapun, cadangan Perdana Menteri itu tidak bermakna Malaysia memandang ringan kepada NAM.

Hak asasi

Katanya, Malaysia sentiasa memandang NAM sebagai pergerakan yang penting, sekurang-kurangnya sebagai forum untuk negara-negara membangun menyuarakan masalah bersama.

"Melalui forum yang disertai oleh sebahagian besar negara di dunia, kita dapat menyuarakan pendapat dan pandangan kita, yang bukan saja akan didengar oleh anggota NAM, malah di seluruh dunia," katanya.

Bercakap kepada wartawan Malaysia di sini hari ini, Perdana Menteri berharap dengan perantaraan sebagai salah satu Naib Presiden Sidang Puncak NAM kesembilan, Malaysia boleh membantu pergerakan itu mencapai matlamatnya.

Malaysia, katanya, akan mem-

== Daripada == A NAZRI ABDULLAH

beri perhatian berat kepada percubaan memaksa konsep baru hak asasi manusia dan demokrasi oleh negara maju ke atas negara membangun.

"Masalah utama di kebanyakan negara membangun sekarang ialah mendapatkan hak untuk hidup, bebas daripada kebuluran dan bebas daripada ancaman ketidakstabilan politik.

"Sebenarnya inilah masalah yang dihadapi oleh kebanyakan negara membangun tetapi tidak diberi tumpuan berat. Malaysia akan menekankan aspek ini di sidang ini," katanya.

Malaysia juga, kata Perdana Menteri memandang berat soal kawalan pasaran oleh negara maju, perdagangan dunia yang tidak adil dan bebanan hutang negara-negara membangun yang semakin meningkat.

"Kita bimbang dengan tindakan segelintir negara maju yang seolah-olah mengetepikan keputusan yang dibuat oleh Pertubuhan Bangsa-Bangsa Bersatu.

"Kumpulan 77 negara maju umpamanya, mempunyai kuasa yang luas dan sebarang keputusan mereka akan memberi kesan kepada seluruh dunia," ujarnya.

Katanya sebagai Pengerusi Kumpulan 77, Malaysia akan menyuarakan pandangan terhadap masalah ini dengan lebih tegas lagi.

Perdana Menteri yang tiba di sini petang semalam mengunjungi Presiden Yugoslavia, Dr Janez Drnosek hari ini.